

Муроқба ҳақидаги асарлардан намуналар | Тазкия дарслари (298-дарс)



19:00 / 15.09.2024 2391

- Абдуллоҳ ибн Динор айтади:

«Умар ибн Хаттоб розияллоҳу анҳу билан бирга Макка томон йўлга чиқдик. Тун охирида бир жойга етганда тўхтадик. Тоғ томондан бир чўпон тушиб келди. Умар унга:

«Эй чўпон! Менга қўйларингдан бирини сот», деди.

«Мен қулман», деди у.

«Хўжайинингга «Бўри еб кетди», деб қўявер», деди Умар.

«Аллоҳ қаерда қолади?!» деди у.

Умар йиғлаб юборди. Эрталаб уни топди. Хўжайинидан сотиб олиб, озод қилди ва:

«Мана шу бир оғиз сўз сени бу дунёда озод қилди. Умид қиламанки, у сени охиратда ҳам озод қилади», деди.

– Абдуллоҳ ибн Муборак бир одамга:

«Аллоҳ таолони муҳофаза қил», деди.

Ҳалиги одам бунинг тафсирини сўраган эди:

«Доимо худди Аллоҳ таолони кўриб тургандек бўл», деди.

– Суфён Саврий: «Ҳеч бир нарса Ундан махфий бўлмайдиган Зотни муҳофаза қил. Вафонинг эгаси бўлган Зотдан ражо қил», деди.

– Абу Усмон айтади: «Менга Абу Ҳафс:

«Агар одамлар билан ўтирсанг, ўзингга ва қалбингга воиз бўл, улар сенинг олдинда жамланганларидан ғурурга кетма. Улар сенинг зоҳирингни муҳофаза қилдилар. Аллоҳ эса ботинингни муҳофаза қилади», деди».

– Ҳумайд Товийл Сулаймон ибн Алига:

«Менга ваъз қил», деди.

«Агар У Зот сени кўриб турганини билиб туриб, маъсият қилсанг, катта нарсага журъат қилган бўласан. Агар У Зот сени кўрмайди деб ўйласанг, кофир бўласан», деди.

«Руҳий тарбия» китобининг 2-жузи асосида тайёрланди

Ушбу китоб Ўзбекистон Республикаси Дин ишлари бўйича қўмитанинг 2021 йил 14 апрелдаги 03-07/2439-рақамли хулосаси асосида чоп этилган.